

## U povodu jubileja – 115 godina rada

Izdvojeno iz materijala pripremljenog za Monografiju osnovnih škola Kantona Sarajevo

### I Opći podaci o školi

**Puni naziv škole:** JU O.Š. «9. maj» Pazarić, Sarajevo

- Sjedište/općina: Pazarić, Hadžići
- Adresa škole (ulica, broj telefona/fax, web stranica, e-mail adresa škole): Pazarić, Bjelašnička 59, tel./faks: 033 416 623 ili 033 417 527.

Web stranica [os9majpa.edu.ba](http://os9majpa.edu.ba), e-mail: [9maj@bih.net.ba](mailto:9maj@bih.net.ba)

- Ime i prezime direktorice: **Azra Jasika**, profesor pedagogije i psihologije
- Ime i prezime v.d. predsjednice Školskog odbora: **Azra Veljković**.
- Ime i prezime sekretara škole: Miralem Dedović
- Ime i prezime psihologa škole: Arijana Osmanović Štukan
- Tačan datum osnivanja ustanove/osnivač: **14. oktobra 1895.** godine je počeo rad ove osnovne škole, ali u najstarijoj sačuvanoj **Spomen knjizi** se ne navodi ime osnivača škole.
- Naziv škole od osnivanja do danas sa tačnim navođenjem perioda:
  - \* Prvi naziv škole bio je **Narodna osnovna škola u Pazariću** za period od 14.10.1895. do početka školske 1958/1959. godine;
  - \* «Državna šestorazredna osnovna škola u Pazariću» od septembra 1958. godine pa do septembra 1963. godine;
  - \* Od školske 1963/1964. godine škola se zove «Osmogodišnja osnovna škola u Pazariću» i taj naziv je ostao do 13. maja 1966. godine;
  - \* Od 13.05.1966. god. Škola nosi naziv **Osnovna škola «Deveti maj» u Pazariću**. To ime se sačuvalo do danas, ali je zbog različitih registracija tokom svih proteklih godina došlo do promjene u ispisu naziva škole, pa je to danas **O.Š. «9. maj» Pazarić**.
- Prekidi u radu škole sa tačnim navođenjem perioda:

Škola je kao ustanova radila u kontinuitetu od osnivanja (1895. god.) do danas. Jedini prekid u radu škole bio je u vrijeme prošlog rata, tj. od 24.04.1992. do 06.09.1993. godine.
- Vrsta škole (privatna ili javna): Škola je danas registrovana kao **Javna ustanova**.
- **Promjena vrste ustanove sa navođenjem perioda:**

Škola je od osnivanja pa do danas u kontinuitetu imala status osnovne škole. U početku je to bila četverorazredna osnovna škola i u imenu je imala odrednicu narodna. Tako je bilo sve do 1958. kada škola postaje **šestorazredna** i to **državna**. U periodu od školske 1953/54. godine pa do septembra 1958. godine đaci naše škole su po završetku IV razreda svoje školovanje nastavljali u Hadžićima i to generacije od V do VIII razreda, a od 1958. god. to su bili đaci sedmog i osmog razreda.

Škola je postepeno prerastala u osmogodišnju osnovnu školu. Taj proces je trajao još nekoliko školskih godina. Svoje prve đake VII razreda upisuje u školskoj 1961/62. godini, a naredne godine i učenike VIII razreda. Od školske 1963/64. godine škola je i definitivno osmorazredna i dobiva novo ime „Osmogodišnja osnovna škola u Pazariću“.

## Važna napomena:

Sve podatke i priloge koji govore o školi u Pazariću i njenom razvoju u periodu od osnivanja pa do 09. maja 1970. godine brižljivo je sakupljao i u prvu Spomen knjigu unio **Konjhodžić Tadžudin**. On je po zanimanju bio učitelj, ali je tokom svog radnog vijeka u školi obavljao različite poslove: učitelj, upravitelj škole, sekretar škole i neki se od nas sjećaju, da ih je baš Tadžo upisivao u prvi razred naše škole.

Fotografije škole, njenih učenika i osoblja škole iz različitog perioda njenog postojanja zajedno sa spiskovima prvih učenika, učitelja, upravitelja, te izjavama bivših učenika i drugi dokumenti, kojima obiluje pomenuta Spomen knjiga, danas su od neizmjerne dokumentarne i historijske vrijednosti za našu školu, ali i sistem školstva u cjelini. Zasluge pripadaju tadašnjem sekretaru škole, Konjhodžić Tadžudinu i Kapetanović Nedžadzu kao upravitelju škole, jer su prikupili i organizirali pomenutu dokumentarnu i drugu građu, otrgnuvši je tako od zaborava, dajući joj novu vrijednost i dimenziju.

**Danas ispisujemo petu Spomen knjigu ili Ljetopis škole, kako bi generacijama koje dolaze, ostavili što veći broj podataka o njenom radu, te amanet o obavezi čuvanja njene tradicije.**

## II Rad i razvoj ustanove (historijat)

- **Kratko** predstavljanje naselja u kojem se nalazi škola i obrazloženje sadašnjeg naziva škole:

**JU OŠ «9. maj** « nalazi se u naselju Pazarić, koje je ujedno centar školskog područja koje obuhvata 3 mjesne zajednice: Pazarić, Lokve, Osenik, te veći broj naselja, sela i zaselaka: Ljubovčići, Lihovci, Dragovići, Resnik, Doljani, Beganovi, Sejdanovići, Urduk, Gornji Zovik, Donji Zovik, Šinici, Buturovići, Kahrmani, Karaosmanovići, Kazina Bara, Beganovi, Ferhatlije, Jeleč i Dub. Školsko područje je vrlo široko i zbog toga u našoj školi ima veliki broj učenika-vozara. U prosjeku godišnje vozari 60–70 % učenika i to iz 3 pravca: Osenik-Pazarić, Ljubovčići-Pazarić i Lokve-Gornji Zovik-Pazarić.

Cjelokupno područje je nastanjeno sa oko 5000 stanovnika. U naselju i okolini djeluje nekoliko malih privrednih subjekata i samostalnih zanatskih trgovinskih ili ugostiteljskih radnji. Najveći broj radno sposobnih stanovnika, za život i izdržavanje porodice zarađuje izvan mjesta stanovanja, tj. u Hadžićima, Ilidži i Sarajevu. Socijalna karta učenika škole govori da je veliki broj djece iz porodica u kojima niko ne radi i da se njihove porodice nalaze u stanju socijalne potrebe što uveliko određuje našu svakodnevnicu i sveukupni radni angažman.

Važno je napomenuti da se Pazarić kao naseljeno mjesto vrlo rano pominje u historijskim spisima i da je jedno vrijeme bio središte općine.

### Podaci o bitnim datumima od značaja za rad škole

**14. oktobar 1895.** godine je najznačajniji datum u historiji škole i školstva u općini Hadžići jer je tog dana počela da radi Narodna osnovna škola u Pazariću.

**1962. godine** od sredstava samodoprinosu izgrađena je baraka sa tri učionice i tako omogućen prijem novih generacija učenika škole. U vrijeme raspisivanja ovog samodoprinosu i dogradnje škole na mjestu upravitelja je bio učitelj Vujović Tomo.

**Od školske 1962/63.** godine škola definitivno prerasta u osmogodišnju osnovnu školu (prvi put upisani učenici VIII razreda). Na putu od četverorazredne do osmogodišnje osnovne škole prošla je period šestorazredne osnovne škole (1958. godine). Đaci sa ovog područja išli su u Hadžiće u školu radi završetka školovanja.

**1965. godine** iz sredstava dopunskog mjesnog samodoprinosu za građane Pazarića izgrađena je još jedna lamela škole sa šest učionica. Prikupljenih 5,000.000 tadašnjih dinara, osim za gradnju objekta utrošeni su za nabavku školske opreme.

**13. maja 1966. godine** na sjednici Savjeta škole donesena je odluka da se **9. maj** proslavlja kao **Dan škole**. Ime škole se sačuvalo do danas, a vezano je za proslavu Dana pobjede nad fašizmom. Od 1967. godine pa sve do danas, svečano i nizom manifestacija, obilježimo taj datum od značaja za školu i lokalnu zajednicu u cjelini. Izuzetak je **1994. godina** kada je zbog situacije na ratištu bila prekinuta redovna nastava, a o proslavi Dana škole je bilo suludo i razmišljati.

**1975.** godina je otvorena su vrata kabinetskoj nastavi u našoj školi jer je izgradnjom treće lamele sa šest učionica, u objektu škole bilo dovoljno mjesta za sve nastavnike da izvode nastavu u učionicama specijalizirane namjene.

**25. 7. 1991.** godine na sjednici Skupštine opštine Hadžići donesena je Odluka o promjeni Statuta Opštine po kojem se uvodi Certifikat o osnovnim školama i one prelaze iz društvenog u državno vlasništvo. Time je OŠ «9. maj» postala javna ustanova u državnj svojnini.

**24. aprila 1992.** god. je prekinuta redovna nastava u školskoj 1991/92. godini usljed ratne opasnosti. Školske prostorije su se **08. maja 1992. godine** silom prilika pretvorile u sjedište općinske uprave i organa vlasti, zatim sjedište teritorijalne odbrane, dok su jedno vrijeme neke prostorije škole korištene kao skladište hrane i opreme Ureda za humanitarnu pomoć.

**Od 06. 9.1993. godine** u objektu škole u Pazariću i još četiri lokacije na školskom području OŠ „9. maj“ organizovana je i izvodila se nastava za djecu osnovnoškolskog uzrasta. Improvizirane učionice su bile u garažama i podrumskim prostorima u Lokvama, Ljubovčićima, Zoviku i Oseniku. Od 18.10.1993. godine u centralnom objektu škole dio učioničkog prostora smo ustupili Mješovitoj srednjoj školi Hadžići, koja se **25.03.1996.** godine vraća u svoj objekat u reintegriranim Hadžićima.

**02. 9. 1996. godine** u analima škole zapisan je kao datum početka prve poslijeratne školske godine. Rad škole se ponovo normalizuje u dvije smjene i dva objekta škole (centralni objekat u Pazariću i objekat područne škole u Lokvama).

**01. 9. 2003. godine** ostatak će zabilježen kao datum kada se u skladu sa Okvirnim zakonom škola počinje profilirati kao inkluzivna, jer je koncept „Obrazovanja za sve“ prihvatila kao pravo i mogućnost za svu djecu osnovnoškolskog uzrasta.

**01. 9. 2004. godine** je zakonom definisan kao zvanični početak školovanja prve generacije šestogodišnjaka u konceptu devetogodišnje osnovne škole. Ministarstvo obrazovanja i nauke Kantona Sarajevo je odredilo da se u školsku 2004/05. godinu upiše pola upisne generacije šestogodišnjaka, što je bilo dovoljno za jedno odjeljenje prvog razreda od 25 učenika. Uporedo sa njima, upisana je i posljednja generacija učenika prvog razreda koji nastavu prate po konceptu osmogodišnje osnovne škole (tri odjeljenja sa ukupno 57 učenika).

## Infrastrukturni razvoj i opremanje škole

Prema zapisu u prvoj od 5 Spomen knjiga i Ljetopisa stoji da je objekat škole sagrađen krajem septembra 1895. godine i od 14. oktobra počinje sa redovnom nastavom četverorazredna osnovna škola. Škola je imala 2 učionice, zbornicu i stan za upravitelja.

Prilikom prve rekonstrukcije školska zgrada je proširena jer joj je dograđena jedna baraka sa tri nove učionice. Objekat područne škole u Lokvama je izgrađen **1959. godine** i od samog otvaranja radi u sastavu osnovne škole u Pazariću.

Iz sredstava općinskog samodoprinosu građana Hadžića u školskoj 1974/75. godini završena je dogradnja jedne lamele školskog objekta i tako su stvoreni bolji uslovi za rad, kao i prelazak na kabinetnu nastavu u školi. Vrijednost radova je iznosila oko šest (6) miliona tadašnjih dinara. Tokom rekonstrukcije škole radilo se u tri smjene, a sama nastava se odvijala u više objekata. Tom prilikom je izgrađena i vrlo uslovna fiskulturna sala. Teret dogradnje škole osjetili su svi, i učenici i radnici, a najviše tadašnji direktor škole Kapetanović Idriz.

U januaru mjesecu 1987. završena je jedna od niza adaptacija objekta područne škole u Lokvama.

Tokom aprila mjeseca 1987. godine po odluci Zbora radnika izvršena je adaptacija ravnog krova na objektu škole u Pazariću i to iz sredstava amortizacije kojima je škola raspolagala. Razlog hitne intervencije bio je u činjenici da je sanitarna inspekcija zabranila korištenje fiskulturne sale dok se ne stvore odgovarajući uvjeti za rad u sali (krećenje uz prethodnu sanaciju krova), stoji u Ljetopisu škole.

Zbog ratnih dejstava po Pazariću i objektu škole došlo je do oštećenja na krovovima pa je u vrijeme ljetnjeg raspusta školske 1993/94. godine izvršena zamjena krovopokrivača na centralnom objektu škole u Pazariću. Uz posredovanje SO Hadžići i Dželilović Mustafe, tadašnjeg prvog čovjeka Općine, i donatorskim sredstvima humanitarne organizacije «IRC» iz Francuske, zaštićena je imovina škole od daljeg propadanja.

Tokom školske 1996/97. godine osposobljena je kotlovnica, te sanirana razvodna mreža i grejna tijela tako da je škola ponovno imala centralno grijanje u funkciji.

U školskoj 1997/98. godini posredstvom Općine Hadžići, humanitarci iz Norveške organizacije CRS su donirali pomoć za sanaciju školskog objekta u Pazariću. Izvedeni su radovi na sanaciji poda u fiskulturnoj sali, zatim sanaciji mokrih čvorova i fasade, uz zamjenu gromobranske mreže i dr. Zahvalnost za ovu investiciju dugujemo Općinskom načelniku Džeko Šefkiji.

Iz sredstava UN za BiH tokom školske 2000/01. godine uspješno je realizovan projekat opremanja ustanove novim inventarom (školske klupe, stolice i stolovi za 4 učionice, stolovi i ormari za zbornicu), zatim opremom za nastavu i urede (3 računara, 2 printera) i još nekim nastavnim sredstvima. Rad na ovom projektu je započeo Turčinović Bajazit, a do kraja ga implementirala Azra Jasika uz veliku pomoć Serdarević Faize.

Projekat zamjene ograde uz objekat škole u Pazariću započeo je 1998., a nastavljen 2001. godine kada je urađena ograda prema magistralnom putu M-17, koji je u to vrijeme prolazio tik pored škole. Sredstvima Ministarstva obrazovanja i nauke Kantona Sarajevo u budžetskoj 2009. godini doveden je do kraja posao ograđivanja školskog dvorišta i igrališta. Uz podršku i razumijevanje Vlade Kantona Sarajevo i naših resornih ministara u protekla tri mandata, te domaćinski odnos odgovornih osoba u školi prema dodijeljenim sredstvima i lični angažman uposlenika na poslovima održavanja škole (domari, noćni čuvari i ložać u školi), uspjeli smo uraditi mnogo posla sa minimalno uloženim sredstvima.

Uz školski objekat u Lokvama 2001. godine je sredstvima Općine Hadžići izgrađena asfaltna višenamjenska ploha. Iste te godine su vojnici njemačkog LOT tima zamijenili 1/3 krovnog pokrivača sredstvima koja su izdvojili od svojih plaća za tu namjenu. U okviru projekta telefonizacije na području Općine Hadžići „*bh telecom*“ je na objektu škole u Lokvama zamjenio krovopokrivač na preostale 2/3 krova i obezbjedio novac za uređenje fasade na školi.

Dalja rekonstrukcija objekta škole u Lokvama je nastavljena u ljeto 2002. godine, zahvaljujući podršci općinskih vlasti na čelu sa Općinskim načelnikom Bajrić Halidom. Donatori iz španske pokrajine Katalonija su prikupljeni novac uložili u: izgradnju ograde oko školskog posjeda, kao i zamjenu podova u učionicama, fiskulturnoj sali i zbornici, sanaciju mokrog čvora, nabavku učioničkog namještaja i dijela nastavne opreme, dogradnju prostorije za kotlovnice, ugradnju kotla na tečno gorivo sa izgradnjom razvodne mreže za centralno grijanje, i na kraju ništa manje važno, uradili djelimičnu zamjenu stolarije na objektu (zamjenjena su tri prozora na sali).

U Pazariću su nastavljeni radovi na obezbjeđenju što boljih uslova rada za učenike i uposlenike, pa je tokom 2002. i 2003. godine izvršena zamjena bravarskih prozora na fiskulturnoj sali novim eloksiranim. Istovremeno je sistem zagrijavanja putem kalolifera u sali zamjenjen novom mrežom grejnih tijela (radijatora) koji su razvodnom mrežom priključeni na školsku kotlovnice. Tokom raspusta 2003. godine uposlenici škole su keramičkim pločicama zaštitili zidne površine u hodnicima i holovima škole od daljeg propadanja, te time olakšali održavanje higijene u školskim prostorijama.

Za centralni objekat škole u Pazariću 2003. godine je italijanski CIMIC putem Evropske unije obezbjedio novac za sanaciju krovne konstrukcije i krovopokrivača na lameli „A“, uz sanaciju stolarije i stropa u istoj. Tom prilikom je izvršena i rekonstrukcija kotlovnice iz koje su dva kotla na uglj zamjenjeni savremenim kotlovima na tečno gorivo.

U ljeto 2005. godine se sredstvima Ministarstva za kulturu i sport Kantona Sarajevo uradila rekonstrukcija školskog igrališta. Za sanaciju podloge igrališta i njegovo asfaltiranje izdvojeno je 41.000,00 KM. Zahvaljujući izvanrednom građevinskom nadzoru izvršena je vrlo kvalitetna rekonstrukcija i obezbjeđen prostor za nogometno i košarkaško igralište, kao i višenamjenski prostor za različite kulturne i sportske manifestacije.

U ljeto 2006. godine ravni dijelovi krova na objektu škole u Pazariću je saniran sredstvima kantonalnog ministarstva nauke i obrazovanja u iznosu od 23.000,00 KM.

U okviru projekta „Bosansko dijete“ humanitarci iz Holandije su u februaru 2009. godine ličnim radom i sredstvima uradili dekoraciju svih prostorija u objektu područne škole i zamijenili četiri učionička prozora. Za preostala četiri prozora čekamo donatore i apliciramo na projekte, kako bi ih konačno zamijenili i lakše zagrijali radni prostor naših mališana u Lokvama.

Iz budžetskih sredstava i od redovne dotacije, te sredstava obezbjeđenih kroz grantove različitih nivoa vlasti putem projekata i aplikacija, u posljednjih 10 godina zamijenili smo u potpunosti raniji učionički namještaj (izuzev ormara), kao i veliki broj prozora (na fiskulturnoj sali i lameli C), zidnih i ulaznih portala i vrata na objektima u Pazariću i Lokvama. Dodajmo toj listi uspješnih intervencija i sanaciju zidnih i podnih obloga u hodnicima i holovima škole, jednoj učionici i fiskulturnoj sali, zatim popločane pristupne staze na glavnom ulazu u školu i na ulazu za učenike i novoizgrađenu jamu sa doskočištem za skok u dalj. Sve to je uvećalo vrijednost imovine škole i unaprijedili uslove za kvalitetniji rad učenika i uposlenika ustanove.

Priča o infrastrukturi nije još gotova.

Ostaju obaveze sadašnjem i budućem menadžmentu škole da sve raspoložive materijalne i ljudske resurse škole stavi u funkciju njenog daljeg opremanja i razvoja. Ovog trenutka bilo bi hitno zamijeniti stolariju na lamelama A i B, kao i četiri portala u atriju škole te ugraditi lift za

osobe sa teškoćama u kretanju, zamjeniti krovnu konstrukciju na lamelama B i C, izvršiti rekonstrukciju sistema centralnog grijanja u centralnom objektu škole u Pazariću, nabaviti učioničke ormare za svako odjeljenje da bi se rasteretile đачke torbe i na kraju nabaviti potreban mobilijar za oba školska igrališta radi razvoja sporta i sportske kulture kod učenika.

## Zanimljivosti iz škole

### **Prvi, prva, prvo (prvi učitelj, prva knjiga za biblioteku, prvi uspjeh, pojedinačne i kolektivne nagrade i društvena priznanja ...)**

- \* Prvi školski objekat u Pazariću je građen u periodu 1894.- 1895. godine. Krajem septembra 1895. godine objekat je konačno završen, a prva školska godina je krenula 14. oktobra 1895. godine upisom prve generacije osnovaca.
- \* Bila je to prva osnovna škola od Bradine do Blažuja, prema zapisu iz Ljetopisa.
- \* Prvi učitelj i upravitelj škole je bio Stevan Todorović.
- \* Prva generacija učenika škole upisana je u školskoj 1895/96. godine i brojala je 71 učenika, od toga je razred završilo 56 učenika. Među njima je bilo samo 8 učenica.
- \* Prvi kotarski predstojnik ostao je u dubokom sjećanju učenika iz prve generacije naše škole. Prenosimo neke dijelove iz izjave Tomanić Jove zabilježene u prvu Spomen knjigu: «Bio je to veliki dobrotvor...Zaslužuje da se zlatnim slovima njegovo ime bilježi i spominje... Nastojao je da se redovnim školovanjem obuhvati što veći broj djece, a za najbolje iz IV razreda je bio obezbjedio i plaćenu dalju školarinu o trošku države. Predloženi su bili: Majunić Marko od katolika, Tomanić Jovo od pravoslavnih đaka i Lihovac Bećir - islamske vjeroispovjesti. Samo je Lihovac Huso dao pristanak svom sinu Bećiru na dalje školovanje, dok ostalima roditelji ne dadoše.“
- \* Prva fotografija školske zgrade nalazi se u Spomen knjizi i u prilogu ovog akta.
- \* Prva Razrednica ili faksimil naslovnice Odjeljenjske knjige je u prilogu među fotografijama.
- \* U analima ove škole stoji zapisano da je prva učiteljica bila Rejić Jelena i radila je samo dvije školske godine, tj. u školskoj 1903/04. godini i naredne godine.
- \* Prva žena upravitelj škole bila je Petrović Darinka i školom je upravljala u periodu od 1924. do 1941 . godine, kada su je tadašnje režimske vlasti suspendovale sa posla, zajedno sa učiteljicama Šiljkut Nadeždom i Šiljkut Zorkom. U saradnji sa školskim odborom, upraviteljica Darinka je radila na povećanju obuhvata djece redovnom osnovnom školom i poboljšavala uslove rada: dovođenje vode u objekat škole, stalne popravke na objektu škole, opremanju škole sredstvima za nastavu i uređenju školske bašte. U tom periodu škola je bila središte kulturnog i društvenog života u Pazariću, za šta je dobivala i razne nagrade i priznanja iz Sarajeva, kako stoji u zapisu koji je u Spomen knjizi napravila Jelka Petrović-Bumbić, Darinkina kćerka.
- \* Prvi tečaj zdravstvenog prosvjećivanja žena realizovan je 1957. godine i na fotografiji u spomen knjizi ćete naći Zovko Milku sa grupom žena-polaznica kursa.
- \* Kao prvi rukovodilac tečaja za opismenjavanje stanovništva (period 1962-1965. godina) navodi se Lukić Gordana, a članovi ispitne komisije su bili: Vujović Tomo, Golubović Vera i Fežić Sedika.
- \* Prvi objekat područne škole izgrađen je 1959. godine u Lokvama. Sa dva kombinovana odjeljenja učenika od I do IV razreda počeo je rad u ovoj područnoj školi.
- \* Prvi predsjednik Savjeta škole bio je Milošević Ilija, izabran 20. novembra 1964. godine.

- \* Prvi predsjednik upravnog odbora škole bio je Bistrić Fadil. Mandat tog Upravnog odbora je trajao od 1964.-1969. godine.
- \* Prvi školski list se zvao «Naš glas». Iz štampe je izašao 08.05.1971. godine u povodu Dana škole.
- \* Osnovne zajednice obrazovanja Sarajevo je 30. 11. 1971. godine nagradila našu školu **Prvom nagradom za postignute rezultate u nastavi**. Iz novinskog teksta koji je sačuvan u Spomen knjizi saznali smo da je ova škola svrstana među 4 škole iz prve kategorije prema rezultatima svoga rada i da je to jedina škola koja ne pripada užem gradskom području. Rezultat je utoliko vrijedniji jer je postignut na eksternoj provjeri znanja učenika (tzv. testiranju).
- \* Priznanja i nagrade za svoj rad tom prilikom su dobili i nastavnici ove škole: Zovko Karlo za uspjeh utvrđen na testiranju znanja učenika iz matematike za IV razred školske 1970/71. godine i Gadžo Dušanka za rezultate na testiranje znanja učenika iz biologije u školskoj 1969/70. godini.
- \* Prvu biblioteku sa čitaonicom škola je dobila februara mjeseca 1972. godine. Na raspolaganju je bila široj čitalačkoj publici, tj. stanovnicima Pazarića, a ne samo učenicima i radnicima škole, jer je imala javni karakter. Bibliotečki fond brojao je 7.000 bibliotečkih jedinica. Biblioteka je radila u prostorijama Društvenog doma, a u njoj je kao bibliotekar radio Tadžudin Konjhodžić. Škola je i do tada imala biblioteku, ali ne tako veliku i sa tako velikim fondom knjiga, a nije imala ni čitaonicu.
- \* Prva posjeta školi jednog šampiona u šahu bila je 03.04.1972. godine, jer u ljetopisu stoji da smo igrali simultanku sa bivšim svjetskim šampionom Tigran Petrosjanom.
- \* Skupština opštine Hadžići je povodom Dana oslobođenja, 1975. godine našoj školi dodijelila **Petoaprolsku plaketu** u znak priznanja za izvanredne rezultate u radu.
- \* Prva omladinska radna brigada «9. maj» je formirana 01.04.1977. godine. U sastavu Omladinske radne brigade «Slobodan Princip Seljo» iz Hadžića njeni članovi redovno učestvuju na ORA širom SFR Jugoslavije.
- \* Najbolju prolaznost učenika škole od 99,38 % Ljetopis bilježi na kraju školske 1976/77. godine (od kako postoji osmogodišnja osnovna škola), ali ne znamo koliko je to učenika koji su uspješno završili razred, jer nedostaje podatak o broju učenika u toj školskoj godini.
- \* Prvi Zbor učenika škole konstituisan je novembra 1978. godine, kao oblik tzv. učeničkog samoupravljanja. Zbor učenika škole je izabrao i svoje rukovodstvo.
- \* Prvo mjesto u pojedinačnoj konkurenciji na Regionalnom takmičenju iz ONO i DSZ osvojio je Kazazović Mirsad. Maja mjeseca 1984. god. održano je pomenuto takmičenje. Škola je zauzela izvanredno drugo mjesto ekipno.
- \* Prvi u vožnji bicikla na Regionalnom takmičenju osnovaca iz saobraćajnog odgoja, aprila 1984. godine bio je Selimović Haris, što je pomoglo osvajanju osmog mjesta ekipno za našu školu.
- \* Male olimpijske igre su imale svoje poklonike i u našoj školi tako da smo npr. 1984. godine sa 11 prvih mjesta, 7 drugih i 5 trećih na Regionalnim takmičenjima izborili plasman na Republičko takmičenje osnovnih škola. Sportska i ritmička gimnastika, stoni tenis i zimski sportovi su bili sportske discipline u kojima smo bili najuspješniji.
- \* Prvo mjesto u likovnom stvaralaštvu na Regionalnom takmičenju 1985. godine osvojile su Maksumić Arijana i Hadžić Adisa, učenice naše škole.
- \* Prvo mjesto na Regionalnoj smotri „Titovim stazama revolucije“ održanoj 26.04.1986. godine u Sarajevu omogućilo je učeniku naše škole, Travar Mihajlu plasman na republičko takmičenje u znanju u konkurenciji VIII razreda.

\* Prvo mjesto i plasman na republičku smotru je pripalo je i modelarskoj sekciji «Maketa spomen kosturnice oslobođiocima Pazarića» (1986. godina).

\* Prvomajsko priznanje Gradske sindikalne organizacije Sarajevo za 1988. godine dodijeljeno je RO Predškolsko i osnovno obrazovanje Hadžići, u čijem sastavu je bila i naša škola. Tom prilikom dodijeljena su i pojedinačne prvomajske nagrade, a među lauratima je bila i učiteljica Bjelica Ljubica, pisala je tadašnja dnevna štampa.

\* Na republičkoj smotri «Titovim stazama revolucije» u Čapljini, 27. maja 1988. godine naša škola je regiju Sarajevo predstavljala u folkloru i radno-tehničkom stvaralaštvu. Rad modelarske sekcije «Spomenici revolucije» zauzeli smo drugo mjesto, a izvorne igre sa Bjelašnice su oduševile posjetioce svih takmičenja i podigle ugled naše škole.

\* Prvo mjesto na krosu «Oslobođenja» u Rajlovcu dvije godine zaredom (1989. i 1990. godine) zauzela je naša učenica Hodžić Aldijana, što je izvanredan rezultat obzirom da se radilo o regionalnom takmičenju.

\* Maja mjeseca 1990. godine je još jedna učiteljica iz naše škole dobila Prvomajsku nagradu Saveza sindikata, bila je to Lukić Gordana.

\* U školskoj 1990/91. godini nastavnik Jusuf Avdić i pedagogica škole Azra Jasika su izradili fleksibilni raspored sati za rad u nastavi sa kombinovanim odjeljenjem. Uz saglasnost direktora škole, Kazazović Osmana nastava u područnoj školi se počela izvoditi po tom rasporedu. Iako je radni dan učitelja trajao duže, učitelj je bio zadovoljan što je u poziciji mijenjati nešto u odnosu na raniji sistem „tihi rad“- „glasni rad“ u kombinovanom odjeljenju, kao i nivoom usvojenosti gradiva od strane njegovih učenika.

\* Po prvi put su u školskoj 1992/93. godini Zovik i Ljubovčići dobili školu, a od naredne školske godine pojavila se potreba zbog bezbjednosti djece da se otvori područna škola i u Oseniku. Tokom cijelog rata se radilo u tri smjene u Pazariću, a u dvije smjene u Lokvama i tri nove područne škole u kojima su formirana odjeljenja razredne nastave.

\* Prvi put u ratu škola broji od 906 do 1046 učenika u periodu 1992.-1996. godina. Ukupan broj učenika bio je raspoređen u 33 odjeljenja na četiri lokacije u školskoj 1992/93. godini. Na kraju rata se radilo na pet lokacija u 36 odjeljenja. Broj zaposlenih u školi je varirao i na popisu se nalazi ukupno 54 uposlenika u Matičnoj knjizi za predmetni period.

\* „*Dulistan*“ je novi naziv školskog lista koji je počeo izlaziti iz štampe od 1997. godine. Tiraž je u početku bio 400 primjeraka, a štampan je dva puta godišnje. Već nekoliko godina „*Dulistan*“ izlazi samo jedanput godišnje i u standardnom tiražu od 500 primjeraka. U školskoj biblioteci se čuvaju po dva primjerka svakog dosad objavljenog broja. U povodu našeg jubileja, 115 godina postojanja i rada škole uskoro će svjetlo dana ugledati novi, devetnaesti (19) broj „*Dulistana*“.

\* U poslijeratnom periodu škola je dobitnik 2 općinska priznanja. *Šestomartovska pohvala* (1996. godine) i *Šestomartovska plaketa* (2001. godine) dodijeljeni su joj za rezultate rada na polju odgoja i obrazovanja. Direktorici škole, Jasika Azri je 2001. godine dodijeljena Šestomartovska pohvala kao priznanje za ostvarene rezultate u radu i rukovođenju školom.

\* Prvu Školsku ligu u malom nogometu i Sportske susrete škola u povodu Dana škole organizovali smo u maju 2001. godine. Ovom vrlo zahtjevnom poslu vrlo odgovorno se posvetio nastavnik Edo Korić radeći sa drugim kolegicama i kolegama (razrednicima) na razvoju sportske kulture kod učenika kao članova takmičarske ekipe, ali i navijačke grupe. Osim učenika/ca iz Tarčina i Hadžića na susretima škola su dosad učestvovali učenici/ce iz Blažuja, Mostara, Opore kod Novog Travnika, Sarajeva, Ilidže... *Najveću podršku navijača svake godine imaju učesnici revijalne utakmice između ekipa naše škole i štićenika Zavoda iz Resnika.*

\* Prvu poslijeratnu *Školu u prirodi* smo realizovali u maju 2001. godine u Zaostrogu za učenike od prvog do petog razreda osnovne škole. Pamtit ćemo je po izvanrednom iskustvu, ljepoti pejzaža i druženju, kao i jednom prelomu ruke na nogometnom igralištu.

\* Prva javna tribina u organizaciji škole održana je 19. maja 2002. godine u Društvenom domu u Pazariću. Sa profesorima Filozofskog fakulteta iz Sarajeva: dr. Mujo Slatina, dr. Jasna Bajraktarević i dr. Ejub Čehić, zajedno sa sportskim trenerom Bajraktarević Fuadom razgovarali smo na aktuelnu temu „Organizacija slobodnog vremena mladih“. Kao specifičnost izdvajamo da su od 25 tadašnjih vijećnika Općinskog vijeća Hadžići na uredno upućenu poziv ovoj tribini, u prepunoj sali doma bili prisutni samo dvojica (Hasan Japalak i Mirsad Telarević).

\* Prvi grant namjenjen unapređenju uslova rada u školama Federacije BiH odobren od Fonda za kvalitet bio je za projekat „Razvoj govorne kulture učenika“ realizovan 2002. godine. Sredstva od 8.000,00 KM utrošili smo na nabavku školske lektire i to 20-tak novih naslova za više od 800 bibliotečkih jedinica.

\* U novembru 2002. godine održano je još jedno općinsko takmičenje pod nazivom „*Svjesnost o postojanju mina*“ na kojem je ekipa naše škole pokazala najviše uspjeha i potom bila treća na kantonalnom takmičenju. Pod rukovodstvom nastavnice Kurtović Adise, ekipa naše škole je pet puta osvajala prvo mjesto na općinskom nivou takmičenja i predstavljala našu Općinu na kantonalnom takmičenju. U nizu uspjeha navodimo jedno drugo mjesto, jedno treće i dva puta četvrto mjesto na tom rangju takmičenja.

\* Prvo međunarodni plasman zabilježen u ljetopisima škole vezuje se uz 13. Međunarodno takmičenje dječijih slika i crteža na temu «Zaštita životne okoline» održan u Japanu 2003. godine. Naša učenica Selma Hidić osvojila zapaženo peto mjesto. Organizator takmičenja je Fondacija za globalni mir i zaštitu životne okoline. Na objavljeni konkurs je pristiglo 10.761 radova iz 57 država.

\* Prvi Ekološki kalendar izradili smo za 2003. godinu. Tim nastavnika je uspio realizovati ideju direktorice škole i od literarnih i likovnih radova učenika (blizu 60 radova) uraditi prelijep ekokalendar nagrađen ***Specijalnom nagradom Saveza gorana*** na konkursu „Sa sadnicom više škola lakše diše“. Štampali smo 250 primjeraka kalendara za 2003. godinu i podijelili ih učenicima - kreatorima radova za uspomenu, a ostatak uposlenicima škole i poslovnim saradnicima kao novogodišnji poklon. Zasluge za uspješnu realizaciju pripadaju nastavnicama: Azri Drina, Zumri Halebić, Rejhani Mehmedić, Jasmini Hasanović i Elvedini Kustura. Originalni materijal čuvamo još i danas u arhivi škole.

\* Iz sredstava Fonda za kvalitet u školskoj 2002/03. godini realizovan je projekat „***Kreiranje mreže aktivnih škola u cilju jačanja uloge škole u radu sa nadarenima***“. Zajedno sa još dvije škole iz Kantona Sarajevo (OŠ „Grbavica I“ i OŠ „Džemaludin Čaušević“) kroz realizaciju projekta smo gradili mrežu aktivnih škola na ovom izuzetno važnom polju odgojno-obrazovnog djelovanja. Po završetku projekta objavili smo Bilten i tako promovisali postignuća u projektnim aktivnostima, te organizirali okrugli sto u čijem fokusu interesovanja su bila nadarena i talentovana djeca. Tom prilikom smo saznali da još uvijek ne postoji strategija rada sa nadarenima. *A sada???*

Od tada pa do danas škola je podržavala uključenje učenika naše škole u rad klubova matematičara „Mladi talenti“ u Drugoj gimnaziji u Sarajevu ili „Area“ na Ilidži, uz povremenu finansijsku pomoć (zavisno od budžeta škole) i nagrade najuspješnijim učenicima na takmičenjima.

\* Na takmičenju „***Bolji školski web***“ u organizaciji OSCE-a, predstavila se i naša škola. U saradnji sa Selimović Harisom, nastavnica Mediha Kabulović je animirala učenike pa su redizajnirali našu web stranicu tokom školske 2003/04. godine. Inače je naša škola dotle bila jedina ustanova sa području općine Hadžići koja ima taj „prozor u svijet“. O tome svjedoče pisma i poruke bivših sugrađana iz cijelog svijeta, zabilježena prilikom posjete web stranici.

\* Naš učenik, Krbezlija Mirnes je 2003. godine nakon prvog mjesta na Kantonalnoj smotri naučno-tehničkog stvaralaštva, sa svojim radom „Saobraćajno sredstvo budućnosti“ izborio plasman na Federalno takmičenje i ostvario plasman na 4. mjesto.

\* Već naredne godine, u školskoj 2003/04. godini imali smo tri predstavnika naše škole na državnoj smotri naučno-tehničkog stvaralaštva u Bugojnu. Uz stručnu pomoć nastavnice Ane Boček učenici: Grebović Mustafa, Kahrmanović Amar i Hujić Ammar su zabilježili značajne uspjehe. Hujić je bio napravio inovaciju koja je privukla veliku pažnju i nazvao je „Pegla za zavarivanje plastičnih kesa“.

\* Najveći broj *drugih i trećih mjesta* na kantonalnom nivou osvojili smo *u atletici, tačnije u krosu*. Uz prirodnu predispoziciju i uslove za prirodno kretanje, naši učenici se kroz redovnu nastavu Tjelesnog i zdravstvenog odgoja i atletsku sekciju, koju vodi nastavnik Edo Korić, te usmjerenost na bavljenje sportom bilo koje vrste, pripremaju za ovu vrstu takmičenja.

\* Kroz Projekat „Zdravih škola“ u okviru WHO (Svjetske zdravstvene organizacije) i naša škola je maksimalno angažovana na promociji zdravog življenja. Od školske 2003/04. godine smo krenuli u kampanju prikupljanja starog papira pod nazivom „Budućnost je počela“, da bi u povodu Dana planete Zemlje proglasili najuspješnija odjeljenja i najbolje nagradili izletom ili na neki drugi način. Svi značajni datumi iz eko-kalendara se redovno obilježavaju na odgovarajući način. Npr. Dan jabuke, 20. oktobar obilježimo tako što svi u školi (učenici i uposlenici) pojedju za užinu po jednu jabuku ili neki proizvod od jabuke, a na Dan pješačenja idemo na pješačke ture sa planinarima iz PSD Pazarić ili na Dan borbe protiv pušenja (31. maj) u školi nikako nema pušenja (svoju strast obuzdaju i najokoreliji pušači).

\* Pod motom „Daj mi ključić za bravicu da otključam knjižicu“ učenici IV-3 u školskoj 2003/04. godini i njihova učiteljica Adila Musić uradili su pano za takmičenje „Knjiga je moj najbolji prijatelj“. Nakon što je bio najbolji na općinskom nivou, na kantonalnom takmičenju je zauzeo odlično treće mjesto.

\* Menadžment škole se izvježbao u izradi projekata za dobojanje sredstava iz grantova viših nivoa vlasti pa smo sa projektom „Muzikom i sportom protiv droge“ u školskoj 2003/04. godini uspjeli obezbjediti novih 8.000,00 KM za nabavku opreme i učila za nastavu Muzičke kulture i Tjelesnog i zdravstvenog odgoja.

\* Prva organizovana posjeta Prokoškom jezeru kod Fojnice izvedena je juna 2004. godine, a ostala je zapamćena kao svojevrsna avantura za sve njene učesnike. Stanovnici planinskih koliba uz jezero rekli su nam da nikad veći autobus nije došao do njihovog naselja, što je samo potvrdilo opravdan strah putnika (osoblja škole) od provalija koje su se duž šumskog puta mogle vidjeti iz autobusa. Pa ipak, to nas nije spriječilo da uživamo u prirodnim ljepotama Prokoškog jezera i Fojnice...

\* U školskoj 2004/05. godini po prvi put se, na prijedlog Vijeća učenika škole, Dan državnosti Bosne i Hercegovine počeo obilježavati kvizom iz historije. Takmiče se u dvije kategorije: VII i VIII razred. Ekipu čine po 2 učenika odjeljenja. Zadaci su edukativnog i zabavnog karaktera, a priprema ih nastavnica Biber Mediha. Kroz kviz se provjerava znanje, razumijevanje i povezivanje činjenica iz historije, te jezičke i kulturne tradicije i baštine. Zanimanje djece za kviz je veliko.

\* U martu 2005. godine na Kulturno-umjetničkoj reviji učenika osnovnih škola općina Hadžići i Trnovo, nakon još jedne pobjede i plasmana na kantonalni nivo sa horskom izvedbom sevdalinke, te sjajnom pripremom orkestra, nastavnica Hatidža Horman je zadivila sve prisutne kolege i članove žirija. Neki su se našalili rekavši da bi ovakvog nastavnika bilo poželjno „klonirati“ kako bi efekti rada sa djecom bili što bolji.

\* U povodu 110. rođendana škola je dobila i svoju himnu. Tekst i muziku su napisali bivši učenici škole Vanja Avdić-Čabrić i Denis Čabrić. Tekst ide ovako: \_\_\_\_\_

## Himna O.Š. „9. maj“

Ako želiš biti dobar,  
rijekom znanja zaplovi,  
ruku meni dodaj ti  
zajedno smo još jači tim!

Uči, pjevaj, pleši sad – deveti maj!  
Treat će ti kad–tad - deveti maj!  
Osjećaš li sreće sjaj - deveti maj!  
Ma uči, pjevaj, pleši sad.  
Ma uči, pjevaj, pleši sad.  
Ma uči, pjevaj, deveti maj!  
Ma uči, pjevaj, deveti maj!

Ako ne znaš gdje je ono,  
kad se pitaš zašto ovo.  
ako ne znaš šta je tamo,  
u moju školu pođi samo!

Kad već želiš biti bolji,  
rijekom znanja zaplovi,  
tad ćeš znati šta je tamo  
u moju školu dođi samo!

Uči, pjevaj, pleši sad – deveti maj!  
Treat će ti kad–tad - deveti maj!  
Osjećaš li sreće sjaj - deveti maj!  
Ma uči, pjevaj, pleši sad.  
Ma uči, pjevaj, pleši sad.  
Ma uči, pjevaj, deveti maj!  
Ma uči, pjevaj, deveti maj!

\* Prva filatelistička izložba u školi pod nazivom „Nauka i kultura islama kroz vijekove“ otvorena je u maju mjesecu 2005. godine. Autor izložbe je Iblizović dr. Mirza, vodeći filatelist u Bosni i Hercegovini.

\* Međunarodni konkurs pod nazivom „Kult vode i održivog razvoja“ u Teheranu 2005. godine rad naše učenice Mehmedić Amile je dobio specijalnu nagradu organizatora. Ostalih 17 učenika naše škole su za svoje učešće na poklon dobili minijaturu sa motivima persijskog ćilima zemlje domaćina.

\* Novo priznanje u školu stiže u junu 2006. godine iz dalekog Japana, kao još jedna potvrda vrijednosti rada naših učenika i njihovog nastavnika Suljević Mehdiye, jer su radovi troje naših učenika: Kadić Bilala, Kadić Alema i Mehmedić Amile bili plasirani među 100 najuspješnijih radova i time odabrani za zvaničnu izložbu na Kanagawa konkursu.

\* Na likovnoj manifestaciji “Mladi voljenom gradu“ 2006. godine smo za kvalitet naše kolekcije radova dobili specijalnu diplomu ministra obrazovanja i nauke u Kantonu Sarajevo, Kešo Safeta.

\* U 2006. godini smo dobili 5 računara i laserski printer (1 od 35 nagrađenih škola iz BiH) na konkursu „Eko-slika, nagradna prilika“ od strane **bh telecom-a**. Na ovom projektu su najviše radili: Azra Drina, Horman Hatidža i Emina Rahmanović sa svojim odjeljenskim grupama .

\*Dobitnici smo većeg broja nagradnih putovanja za učenike i nastavnike kao realizatore različitih projekata iz oblasti ekologije:

- nagradno putovanje u Trogir na konkursu za najuređenije školsko dvorište u 2004. godini prema mišljenju redakcije časopisa „**5 plus**“ – ekološka sekcija i nastavnica Emina Rahmanović u saradnji sa Elezović Zejnilom i osobljem angažovanom na održavanju škole: Kabulović Hamid, Šarenac Bracan, Bužo Aziz, Hukić Hiba, Fazlić Zekija, Turčinović Fata, Odobašić Nihada i Aiša Kazazović;
- nagradno putovanje za troje učenika u mirovni kamp u Barcelonu u 2004. godine u pratnji Arijane Osmanović Štukan, psihologinje škole;
- nagradno putovanje u Budimpeštu za osvojeno **1. mjesto** u BiH na konkursu „**Dani Dunava**“ za 2007. godinu - projekat realizovali: Emina Rahmanović, Azra Drina, Aida Pandur, Ana Boček, Mehdiya Suljević i Fejzić Tidža.

\* Kao konačna nagrada za dugogodišnji trud i ulaganje nastavnice Rahmanović Emine na polju rada sa članovima sekcije prve pomoći došao je plasman naše ekipe na *drugo mjesto na kantonalnom takmičenju u aprilu 2007. godine*. Širom otvorena vrata za članstvo u ovoj sekciji i rezultati u radu grupe potvrđuju opravdan interes učenika za rad u njoj. Ove godine ima oko 60 članova.

\* Zahvaljujući Ambasadi Švicarske u BiH, te uspješnom učešću učenika u projektu **Euroskools 2008**, učenici naše škole su dobili priliku da predstavljaju Bosnu i Hercegovinu u septembru iste godine na kampu namjenjenom promociji ideje fer pleja u nogometu, ali i životu. Proces pripreme i vođenja ekipe povjereno je nastavniku Fejzić Adnanu. Sportski dio priprema radio je zajedno sa nastavnikom Čović Muhamedom.

\* Prvi projektor i računar sa LCD ekranom dobili smo 2008. godine kao donaciju od „**EducAid-a**“, italijanske organizacije koja intenzivno radi na promociji inkluzije. U saradnji sa EducAid-om smo realizirali nekoliko projekata i obuka za nastavnike i članove stručnog tima naše i drugih škola na polju inkluzije. Na tom planu su se posebno angažovale: Snježana Kaleta, Azra Jasika i Arijana Osmanović Štukan, kao predavači i promotori ideje o socijalnoj i obrazovnoj inkluziji.

\* Od septembra 2008. godine svi osnovci u Federaciji BiH obuhvaćeni devetogodišnjom osnovnom školom dobivaju besplatne udžbenike uz obavezu povrata u biblioteku škole po završetku razreda i školske godine. Za učenike stajih razreda (osmogodišnja škola) čije su porodice u stanju socijalne potrebe ili školuju troje i više djece kantonalne vlasti su također obezbjedile udžbenike. To je tek korak na putu do besplatnog školovanja djece u BiH.

\* Na XIII internacionalnom kongresu pedagoga komparativista u Sarajevu, septembra 2008. godine, među odabranim stručnim radovima našao se rad grupe autora (dvoje iz naše škole) nastao kao rezultat istraživanja inkluzivne prakse u saradnji sa NVO DUGA. Nakon toga, u aprilu 2009. godine imali smo izlaganje na Internacionalnoj konferenciji EducAid-a: „Inkluzivne perspektive - Od škole do života odrasle osobe: dobra iskustva za jedan životni projekat“ – predstavljanje našeg pristupa inkluzivnom konceptu i izgradnji inkluzivnog okruženja.

\* Prvi laptop za školu smo obezbjedili kroz učešće na Školskom takmičenju EUFOR-a za 2008/09. godinu, zahvaljujući učenicima VII-2 odjeljenja i njihovoj razrednici Aidi Kovačević. Za urađeni projekat učenici naše škole su za nagradu dobili laptop i projektor, uz naglašenu obavezu korištenja za potrebe rada ustanove.

\* Na kantonalnom takmičenju učenika osnovnih škola iz matematike 15. aprila 2010. godine u Sarajevu naša škola je postigla zavidan uspjeh. **Prvo mjesto Krbezlja Mirze** u konkurenciji učenika VII razreda i **drugo mjesto Kaleta Rasima** među učenicima VIII razreda učinili su da ostvarimo ekipno najbolji plasman od svih škola u Kantonu Sarajevo. Direktnim plasmanom na federalno

takmičenje, ovi sjajni momci su potvrdili opravdanost ulaganja u njih i njihov razvoj od strane njihovih roditelja, nastavnika i menadžmenta škole.

## Spisak svih upravitelja/ica ili direktora/ica škole

(od osnivanja škole do danas)

Red. br.	Prezime i ime upravitelja ili direktora	Mandat		Profil stručne spreme
		od	do	
1.	Stevan Todorović	14.10. 1895. god.	kraj šk. god.	učitelj
2.	Mandić Savo	01.09.1896. god.	nepoznato	učitelj
3.	Ignjatović Ilija	šk. 1900/01. god.	nepoznato	učitelj
4.	Šamo Husein	šk. 1901/02. god.	kraj šk. 1904/05.	učitelj
5.	Komadina Lj.	šk. 1904/05. god.	kraj šk. 1907/08.	učitelj
6.	Knežević V.	šk. 1908/09. god.	kraj šk. 1908/09.	učitelj
7.	Vojnović P.	šk.1909/10. god.	nema podataka	učitelj
8.	Gučevac Ilija	šk. 1911/12. god.	do kraja 1924. g.	učitelj
9.	Petrović Darinka	od 1924. god.	kraj šk. 1940/41.	učitelj
10.	Dubravica Ivan	od 1941. god.	kraj sept. 1943. g.	učitelj
11.	Konjhodžić Tadžudin	31.08.1943. god.	do 1947. god.	učitelj
12.	Šiljkut Nadežda	u periodu 1945.-1951. godine	nakon Tadžudina!	učitelj
13.	Marjanović Milenko	period 1945.-1951.	nakon Nadežde!-do 01.09.1955.	učitelj
14.	Bjelica Milenko	01.09.1955. god.	13.02.1957.	učitelj
15.	Zovko Karlo	13.02.1957. god.	03.10.1958. god.	učitelj
16.	Montina Vlado	šk. 1958/59. god.	nije poznato	učitelj
17.	Odović Lazar	šk.1959/60. god.	nije poznato	učitelj
18.	Vujović Tomo	šk. 1960/61. god.	1964/65. god.	učitelj
19.	Vukičević Milan	šk. 1965/66. god.	nije poznato	nepoznato

20.	Bjelica Milenko	šk. 1966/67. god.	21.09.1967.	učitelj
21.	Kapetanović Nedžad	21.09.1967. god.	01.03.1973.	nastavnik - reizbor 1971. god.
22.	Kapetanović Idriz	01.03.1973.	10.01.1977.	nastavnik historije
23.	Aćimović Radmilo	11.01.1977.	01.04.1983.	nastavnik tehničkog odgoja
24.	Kazazović Osman	02.04.1983.	31.10.1991.	nastavnik matematike
25.	Turčinović Bajazit	01.11.1991.	30.06.2000.	nastavnik fizike i tehničkog odgoja
26.	Jasika Azra	01.07.2000.	do danas	profesor pedagogije i psihologije

Napomena:

Svi podaci uneseni u navedene tabele su preuzeti iz Ljetopisa i Spomen knjiga, kao i Matične knjige radnika/uposlenika, koje škola posjeduje i nisu vršene bilo kakve provjere ili dopune podataka. Molimo da se ova činjenica ima u vidu.

Ukoliko neko od bivših učenika ili uposlenika naše škole zna neke nove pojedinosti ili činjenice korisne za našu dokumentacionu građu molimo da se javi na adresu škole. Hvala.

**Ljetopise za Vas prelistala i tekst napisala Azra Jasika**

Tehnički urednici: Azra Jasika i Edin Hdžimulić